

治閉結并脚氣

饒醫熊彥誠年五十五歲病前後便溲不通五日腹
脹如鼓同輩環視皆不能措力與西湖妙果僧慧月
相善遣信邀致訣別慧月驚馳而往過釣橋逢一異
客風姿瀟灑出塵揖之曰方外高士何子子走趨如
此慧月曰一善友久患閉結勢不可療急欲往問客
曰此易事也待奉施一藥卽脫靴入水探一大螺而
出曰事濟矣持抵其家以鹽半匕和穀生搗碎置病
者臍下一寸三分用寬帛緊繫之仍辦觸器以須其
通慧月未深以爲然姑巽謝之熊昏不知人妻子聚

泣諸醫知無他策謾使試之曾未安席砉然暴下醫
愧歎而散慧月歸訪異人無所見矣熊後十六年乃
終白石董守約以脚氣攻注爲苦或教之搥數螺傳
兩股上便覺冷氣趨下至足旣而亦安

類編

附船愈脚氣痛

顧安中廣德軍人久患脚氣筋急腿腫行履不得因
至湖州附船中有一袋物爲腿酸痛遂將腿閣袋上
微覺不痛及筋寬而不急乃問梢人袋中何物應曰
宣瓜自此脚氣頓愈

名醫錄

脚蹩

有人病兩脚蹇不能行舉詣佗望見云已飽針灸服藥矣不須復看脉便使解衣點背數十處相去或一寸或五寸縱邪不相當言灸此各十壯灸創愈卽行後灸處夾脊一寸上下行端直均調如引繩也

漢書

華佗傳

旋復根汁能續筋

筋斷復續者取旋復根絞取汁以筋相對取汁塗而封之卽相續如故蜀兒如逃走多刻筋以此續之百不失一

時康祖心漏

時康祖大夫患心漏二十年當胸數竅血液長流屢訪名醫皆云不可治或云竅多則愈損閉此則慮冗他岐當存其一二猶爲上策坐此形神枯瘁又積苦腰痛行則偃僂不飲酒雖雞魚蟹蛤之屬亦皆不入口淳熙四年通判溫州郡守韓子溫見而憐之爲檢聖惠方載腰痛一門冷熱二證示之使自擇康祖報曰康祖年老久羸安敢以爲熱始作寒冷治療取一方用鹿茸者服之踰旬痛減仍覺氣宇和暢遂一意專服悉屏他藥洎月餘腰屈復伸無復呼痛心漏亦

愈以告醫者皆不能測其所以然後九年康祖自鎮
江通判滿秩造朝訪子溫則精力倍昔飲饍無所忌
步履輕捷云漏愈之後日勝一日子溫書吏吳汝弼
亦苦是疾使就求藥服之旬有二日而差其方本只
治腰痛用鹿茸去毛酥炙微黃附子炮去皮臍皆二
兩鹽花三分爲末棗肉丸三十丸空心酒下已志

鱖魚覆漏

馬提刑記醫先祖忠肅公天聖中以工部尚書知濠
州家有媼病漏蓋十餘年一日老兵掃庭下且言前
數日過市有醫自遠來道瘡漏可治特頃刻之力耳

媼曰吾更疑多矣不信也其黨有以白忠肅公者卽
爲召醫視之曰可治無疑須活鱖一條竹針五七枚
醫乃擲鱖於地鱖困屈盤就盤以竹針貫之覆瘡良
久取視有白蟲數十如針著鱖醫卽鈴置杯中蠕
動如線復覆之又得十餘枚如是五六醫者曰蟲固
未盡然其餘皆小蟲竟請以常用藥傅之時家所有
檳榔黃連爲散傅之醫未始用藥明日可以乾艾作
湯投白礬末二三錢洗瘡然後服藥蓋老人血氣冷
必假艾力以佐湯而艾性亦能殺蟲也如是者再卽
生肌不一月當愈旣而如其言醫曰瘡一月不治則

有蟲蟲能蠕動氣血亦隨之故瘡漏不可遽合則結
痛實蟲所爲又曰人每有疾經月不痊則必憊虛勞
婦人則補脾血小兒則防驚疳二廣則并治瘡瘍醫
無名於世而治疾有效亦良醫也又其言有理故併
錄之

良方

鱗漏

有人脚肚上生一瘡久遂成漏凡經二年百藥不効
自度必死一村人見之云此鱗漏耳但以石灰二三
升百沸湯泡薰洗如覺瘡痒卽是也病者如其言用
灰湯淋洗果痒竟用此洗不三兩次遂乾

蟻漏

有婦人項下忽生一塊腫漸緣至妳上腫起莫知何病偶用刀刺破出清水一椀日久瘡不合有道人見之曰此蟻漏耳緣喫飯喫食蟻得此詢婦人云當來喫飯時羣蟻緣飯上逐之用湯泡喫往往有死蟻在中不覺食之道人云此易治但用穿山甲數片燒存性爲末敷瘡山遂愈蓋蟻畏穿山甲故也

犬喫瘤得針

處士蒯亮言其所知額角患瘤醫爲剖之得一黑石碁子巨斧擊之終不傷缺復有足脛生瘤者因至親

家爲獠犬所齧正齧其瘤其中得爲針百餘枚皆可
用疾亦愈

稽神錄

灸鼠漏

柳休祖者善卜筮其妻病鼠瘤積年不差垂命休祖
遂卜得頤之復按卦合得姓石人治之當獲鼠而愈
也旣而鄉里有奴姓石能治此病遂灸頭上三處覺
佳俄有一鼠近前而伏呼犬咋之視鼠頭有三灸處
妻遂差

拾遺記

李生虱瘤

浮梁李生得痒疾隱起如覆盂無所痛苦背唯奇痒

不可忍飲食日以削無能識其爲何病醫者秦德立見之曰此風瘤也吾能治之取藥傳其上又塗一絲帶繞其圍經夕瘤破出虱斗許皆蠢蠕能行動卽日體輕但一小竅如箸端不合時時虱涌出不勝計竟死予計唐小說載賈魏公鎮滑臺日州民病此魏公云世間無藥可療唯千年來木梳燒灰及黃龍浴水能治爾正與此同

腫癭

病腫

先痛而後腫氣傷形也先腫而後痛形傷氣也風勝

則痛熱勝則腫燥勝則乾寒勝則浮濕勝則濡

腫

釋名曰腫鍾也寒熱氣所鍾聚也

太平御覽

陰腫如升

治男子陰腫大如升核痛人所不能治者擣馬鞭草塗之

小兒陰腫

小兒陰囊勿心虛腫痛以生甘草湯調地龍糞輕輕塗之

小兒熱毒遊腫

破草鞋人亂髮燒灰醋和傅治熱毒遊腫

本草

婦人陰腫堅硬

用枳實半斤碎炒令熟故帛裹熨冷則易之

同上

腳腫

有男子六十一歲腳腫生瘡忽食猪肉不安醫以藥利之稍愈時出外中風汗出後頭面暴腫起紫黑色多睡耳輪上有浮泡小瘡黃汁出乃與小續命湯加羌活一倍煎服之遂愈

本草衍義

背腫

楊愔患背腫馬嗣明以鍊石塗之便差鍊石法以麤

黃色石如鷺鴨卵大猛火燒令赤內醇醋中自有石屑落頻燒至石盡屑曝乾搗篩醋和塗腫上無不愈

傳腫

仁宗在東宮苦臃腫用赤小豆末傅之遂愈或云可

療發背

洞微志

癰

說文曰癰頸癰也典術曰服食天門冬治癰除百病

太平

御覽

井錫鑿癰

汝州人多病頸癰彼境地饒風沙沙入井中飲其水

則生癭故金房間人家井以錫爲井欄皆以夾錫錢
鎮之或沉錫其中則飲者免此患華亭有一老僧昔
行脚河南管下寺僧僮僕無一不病癭時有洛僧共
寮每食取携行苔脯同餐經數月僧項贅盡消若未
嘗病寺僕歎訝乃知海岸鹹物能除是疾

癭志

中毒

中仙茅附子毒

鄭長卿資政說少時隨父太宰官懷州一將官服仙
茅遇毒舌版出口漸大與肩齊善醫環視不能治一
醫獨曰尚可救少緩無及矣取小刀斡其舌隨破隨

合務至百數始有血一點許醫喜曰無害也舌應時
消縮小卽命煮大黃朴硝數碗連服之并以藥末搽
舌上遂愈又蓋諒郎中說其兄說因感疾醫盧生勸
服附子酒每生切大附二兩浸以斗酒旦起輒飲一
杯服之二十年後再爲陝西漕使諒自太學歸過之
南樂縣拉同行中途曉寒說飲一杯竟復令溫半杯
此酒至自覺微醉乃與妻使飲行數里妻頭腫如斗
脣裂血流下駐路傍呼隨行李職醫告之李使黑豆
菽豆各數合生嚼之且煎湯併飲至曉腫始消說仍
服之不輟到長安數月失明遂致仕時方四十二歲

中蠱毒

崇寧間蘇州天平山白雲寺五僧行山間得簞一叢甚大摘而煮食之至夜發吐三人急採鴛鴦草生啖遂愈二人不甚肯啖吐至死此草藤蔓而生對開黃白花傍水依山處皆有之治癰疽腫毒尤妙或服或傳皆可今人謂之金銀花又曰老翁須本草名爲忍冬

冬

並出
已志

中鱔蝮蝥毒

頃有一士人好食鱔魚及蝮與蝥蝥嘗云此三物不可殺大者有毒殺人蝥蝥小者亦令人小便秘臍下

敵疼有至死者宜以生豉一大合投新汲水半椀浸
令豉水濃頓服之卽差

茅亭客話

中豆腐毒

人有好食豆腐因中其毒醫治不效偶更醫醫至中途偶見做豆腐人家夫婦相爭因問之云今早做豆腐妻悞將蘿蔔湯置腐鍋中今豈腐更就不成蓋腐畏蘿蔔也醫得其說至病家凡用湯使率以蘿蔔煎湯或調或嚥病者遂愈

諸果有毒

諸果有毒桃杏雙仁有毒五月食未成核果令人發